

Abitaziuns da vacanzas – ina schliaziun è sin buna via

Iniziants cuntanschan in cumpromiss cun la pld e pps

■ (sda/anr) La smanatscha d'in referendum po influenzar a moda decisiva ina lescha. Pertutgant l'iniziativa d'abitaziuns secundaras ha la smanatscha fatg effect. La pld e la pps han fatg concessiuns e pussibilità in cumpromiss.

La cunvegna che represchentants dad omaduas fracziuns e l'inizianta Vera Weber han sutscrit il glindesdi saira pertutga trais puncts contestads da la lescha d'abitaziuns secundaras. La pld e la pps han confermà da far concessiuns en quests puncts e Weber ha empermess che sia organizaziun desistia dal referendum.

Damai ch'i sa tracta tar questas concessiuns per gronda part era da las pretaisas da l'ala sanestra e verda è tut i tenor plan: La gronda maioritad dal cussegl naziunal è stada d'accord ier cun las propostas da cumpromiss ed ha prendì autras decisiuns ch'il cussegl dals chantuns pertutgant plirs puncts impurtants da la lescha.

Nagina excepziun per abitaziuns scrittas ora

La pli impurtanta midada è ch'ins ha stritgà l'excepziun per abitaziuns che vegnan scrittas ora per dar a fit en l'internet. Questa proposta dal cussegl federal aveva chattà ina maioritad en il cussegl dals chantuns. Ils adversaris han crititgà ch'ins na possa gnanc controllar sche las abitaziuns vegnian propri dadas a fit.

Silva Semadeni (ps/GR) aveva gia en la commissiun pretendì da stritgar questa excepziun ord la lescha. La pld e pps èn ier vegnidas cun la medema proposta. Ils sanesters e verds èn stads inchantads da questa midada da tenuta. La pps ha dentant era stuì tadlar critica pervi da sia vieuta.

Decisiv saja d'impedir in referendum, ha respundì Adrian Amstutz (pps/BE) sin las renfatschas. Perquai stoppian ins tanscher maun per schliaziuns. E la finala saja quai bain lubì da vegnir pli perdert.



Hans Grunder, (pbd/BE), Siliva Semadeni (ps/GR), Hansjörg Hassler (pbd/GR) e Martin Landolt (pbd/GL), da dretg a sanestra, èn sa festschentads cun l'iniziativa da segundas abitaziuns.

KEYSTONE

Cun 146 cunter 42 vuschs ha il cussegl naziunal stritgà l'excepziun ord la lescha.

Midar hotels vegls en abitaziuns

Er ils dus auters puncts dal cumpromiss ha il cussegl acceptà a moda clera: Sulet bajetgs protegids e bajetgs impurtants per il maletg d'in vitg duain ins dastgar midar en abitaziuns secundaras. Il cussegl dals chantuns aveva decidì che era bajetgs «degns da mantegnair» dastgian

vegnir midads sch'els sajan periclitads dad ir en decadenza.

Ils sanesters e verds han refusà quai, damai ch'ils chantuns e las vischnancas dastgan decider sezs tge che vala sco «degn da mantegnair». Quai mainia mo a decisiuns arbitrarias, è stà l'argument da la sanestra. Quai chaschunia mo ina massa cas giuridics, hai gi num da vart da la pps. Era la proposta, che hotels nunrentabels dastgian midar sulet la mesadad da la surfatscha en abitaziuns secun-

daras, ha il cussegl naziunal acceptà cun 145 cunter 44 vuschs. La pcd e pbd han empruvà adumbatten da cuntanscher ina midada da l'entira surfatscha.

Il cussegl naziunal n'ha ier anc betg terminà sia discussiun davart la lescha. Oz ha el anc da decider davart las premissas per midar abitaziuns primaras en abitaziuns da vacanzas e davart la dumonda sch'ins duai declarar la lescha sco urgenta.

➤ PUNTG DA VISTA